

Lou mey machant de touts, alabets, que-s lhèbe e qu'ou dits : « *Hore d'aci, bielhas, bestit de perrechs e pedas. Nou-t debém ospitalitat puch que n-as nat escut enta paga.* » E d'û pous que yête ta dehore lou pràube òmi qui cad coum û esteruc. Lou bielh que-s tourne apita, e que semble aus aulhès amudats tout d'û cop que bienè de mey en mey gran. Que lhèbe ue mâ, e d'ue bouts tarrible : « *Malurous qui m'abét cassat, que soy sen Yoan, deu paradis debarat per la mie hèste ta-b sauba. Aci nou poudét mey demoura...mey capbat que l'ihèr serat yetats, e per l'eternitat.* » L'òmi que s'esbalise dehens la brume de mey en mey espèsse, daban lous oelhs deus machans pastous espabentats. Que s'y entenou alabets de l'Espagne au Béarn e dinque au houns deu Bascoat, û d'aquets cops de tounèr qui prémen lous cos. E cadu que tremoulabe en aténde û d'aquéstes malurs qui hèn fremi au trubès dous sègles. E , coum ère biengut, l'auràtje que s'estanguè, las estéles que tournèn lusi au miey d'û cèu d'estiu néte e fresc

Lou lendedie, lous qui passèn per aqui qu'estoun mey estounats de béde û lac en place deus pechedés e cuyalas, e pas mey, tapoc, d'òmis ou de bèsties, à yamey engourgats au houns de las aygues pourtant clares. Que s'y miralhaben lous soums e las brumes qui-s passejen p'ou cèu endaban, beroy à plasé. E que-s parech que touts ans, quon de turoun en turoun s'aluguen las halhes de Sent Yoan, que s'y enten lous plous e las malayes deus aulhès maudits, mesclats à la tintère de las esquires e deus esquirous deus troupèts, e dous layrets dous praubes câs. Lou Sarralhè